



Inatsisartuni ilaasortaq Aqqa Samuelsen, Inuit Ataqtigiit
/ maani

**Qasigiannguani umiarsualivik pillugu § 37 naapertorlugu apeqquteqaammut
2019-332-mut akissut**

29-10-2019
Suliaq nr.: 2019 - 23088
Id nr. 46100851

Asasara Aqqa

Inatsisartut suleriaasianni § 37 naapertorlugu Qasigiannguani umiarsualivik pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

- 1. Umiarsualivinnut immikkoortumut pilersaarut Kalaallit Nunaanni 2017-2027 Qasigiannguani umiarsualivimmi sanaartukkap normulernerqarsimasup 110.02 aamma 110.06-ip akornanni, aalisariutit tulaffigisartagaanni umiarsualivik aserfallatsaalineqarpoq. Ujaqqat imaanut nakkaatinneqarput imaq ikkappallaalersillugu. Umiarsuit aalisariutillu tulassinnaajunnaarsinneqarnissaat siunertaava?**

Akissut: Naagga. Umiarsualiviup saavanut ujaqqanik immiineq Imapik ikaarlugu umiarsuarnut talittarfiup iluarsaanneqarneranut ingerlasumut atatillugu ingerlanneqarpoq. Ujaqqat talittarfiup iigartaata iluarsaanneqarnerani noqittussatut nakkaatitaapput. Tamatuma kingorna ujaqqat immap naqqaniittut piiarneqassapput, taamaalillunilu immap itissusia uterteqqinneqassalluni.

- 2. Immap ikkappallaalernissaa pillugu atuisut susassaqtullu (umiarsualivimmi sulisut/umiarsuaatillit/aalisariutaatillit) qanimut ilisimatinneqarsimappat tusarniarneqarlutillu?**

Akissut: Najukkami umiarsualivimmi oqartussaasut umiarsualivimmi iluarsaassineq pillugu ilisimatinneqarsimapput, taakkulu paasissutissat soqutigisaqartunut ingerlateqqinnissaat akisussaaffigaat.

- 3. Naalakkersuisut ilisimanerlugu Qasigiannguani umiarsualivik ima aserfallassimatigisoq, allaat nutaamik sanaartoraanni akilersinnaanerussasoq?**

Akissut: Imapik ikaarlugu umiarsuarnut talittarfiup iluarsaanneqarnerani ingerlasumi maanna toqqaviusoq tamakkiisumik atorsinnaasutut naliliiffigineqarpoq, aammalu piffissaq atasinnaassusia ukiunut arlalinnut sivitsorneqarpoq. Taakku saniatigut talittarfiup qaavata qalliutaata pitsanngorsarneqarnissaa pilersaarutigineqarpoq, taannalu pilersaarutit malillugit 2021-mi pissaaq. Taakku tunngavigalugit nutaamik talittarfillorneq akikinnerussatut naliliiffigineqanngilaq.

**4. Nutaanik umiarsualivinnik sanaartornermi pingaarnersiuner
Qasigiannuani umiarsualivik sumi inissisimava?**

Akissut: Naalackersuisoqarfiup Kalaallit Nunaanni umiarsualivinnik tulleriarinera 2017-2027-mut Umiarsualivinnut Pilersaarut tunngavigalugu aqqissuunneqarpoq.

Qasigiannuani Imapik ikaarlugu talittarfik illoqarfimmi pisussaaffinnut matuma siulianiittunut pingaaruteqarpoq, tamannalu tunngavigalugu tulleriarisoqarpoq.

5. Qasigiannuani nutaamik umiarsualivimmik sanaartortoqassappat nunatta karsianut aningaasartuutaasussat pillugit Naalackersuisut paasisussutissiinnaappat?

Akissut: Talittarfimmik nutaamik sananermut akiusoq misissuiffigineqanngilaq, kisiannili ukiuni kingullerni tallimani akit aallaavigalugit aningaasartuutissat 40 mio. koruunit sinnerlugit amerlassuseqarnissaat ilimagineqarpoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Karl Frederik Danielsen